

**FRAMKVÆMDARÁKVÖRÐUN FRAMKVÆMDASTJÓRNARINNAR
(ESB) 2022/1949****2023/EES/8/49****frá 13. október 2022**

um að koma á jafngildi COVID-19-vottorða sem gefin eru út á Nýja-Sjálandi, að því er varðar Cooks-eyjar, Niue og Tókelá, og vottorða sem gefin eru út í samræmi við reglugerð Evrópuþingsins og ráðsins (ESB) 2021/953, til þess að greiða fyrir réttinum til frjálsrar farar innan Sambandsins (*)

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af reglugerð Evrópuþingsins og ráðsins (ESB) 2021/953 frá 14. júní 2021 um ramma um útgáfu, sannprófun og viðurkenningu samvirkandi COVID-19-vottorða um bólusetningu, próf og bata (stafrænt ESB-vottorð vegna COVID) til að auðvelda frjálsa för á meðan COVID-19-heimsfaraldurinn stendur yfir ⁽¹⁾, einkum 2. mgr. 8. gr.,

og að teknu tilliti til eftirfarandi:

- 1) Í reglugerð (ESB) 2021/953 er mælt fyrir um ramma um útgáfu, sannprófun og viðurkenningu samvirkandi COVID-19-vottorða um bólusetningu, próf og bata (hér á eftir nefnt „stafrænt ESB-vottorð vegna COVID“) í því skyni að auðvelda handhöfum þeirra að nýta sér rétt sinn til frjálsrar farar á meðan COVID-19-heimsfaraldurinn stendur yfir. Hún á einnig að stuðla að því að auðvelda afléttingu í áföngum á takmörkunum á frjálsri för, sem aðildarríkin hafa sett í samræmi við lög Sambandsins til að hefta útbreiðslu SARS-CoV-2, með samræmdum hætti.
- 2) Reglugerð (ESB) 2021/953 heimilar viðurkenningu COVID-19-vottorða sem þriðju lönd gefa út til handa borgurum Sambandsins og aðstandendum þeirra ef framkvæmdastjórnin kemst að þeirri niðurstöðu að umrædd COVID-19-vottorð séu gefin út í samræmi við staðla sem líta ber á sem jafngilda þeim sem komið er á fót samkvæmt þeirri reglugerð. Enn fremur verða aðildarríkin, í samræmi við reglugerð Evrópuþingsins og ráðsins (ESB) 2021/954 ⁽²⁾, að beita þeim reglum sem mælt er fyrir um í reglugerð (ESB) 2021/953 gagnvart ríkisborgurum þriðju landa sem falla ekki undir gildissvið þeirrar reglugerðar en dvelja eða eru búsettir löglega á yfirráðasvæði þeirra og hafa rétt til að ferðast til annarra aðildarríkja í samræmi við lög Sambandsins. Af þeim sökum ættu sérhverjar niðurstöður um jafngildi sem mælt er fyrir um í þessari ákvörðun að eiga við um COVID-19-vottorð um bólusetningu og próf sem gefin eru út á Nýja-Sjálandi að því er varðar Cooks-eyjar, Niue og Tókelá til handa ríkisborgurum Sambandsins og aðstandendum þeirra. Á sama hátt ættu slíkar niðurstöður um jafngildi á grundvelli reglugerðar (ESB) 2021/954 einnig að eiga við um COVID-19-vottorð um bólusetningu og próf sem gefin eru út á Nýja-Sjálandi að því er varðar Cooks-eyjar, Niue og Tókelá til handa ríkisborgurum þriðju landa, sem dvelja eða búa löglega á yfirráðasvæði aðildarríkjanna, með þeim skilyrðum sem mælt er fyrir um í þeirri reglugerð.
- 3) Hinn 15. nóvember 2021 samþykkti framkvæmdastjórnin framkvæmdarákvörðun (ESB) 2021/1993 ⁽³⁾ um að koma á jafngildi COVID-19-vottorða sem gefin eru út á Nýja-Sjálandi í samræmi við kerfið „Covid-skráin mín“ og vottorða sem gefin eru út í samræmi við reglugerð (ESB) 2021/953, til þess að greiða fyrir réttinum til frjálsrar farar innan Sambandsins.

(*) Þessi ESB-gerð birtist í Stjttíð. ESB L 268, 14.10.2022, bls. 46. Hennar var getið í ákvörðun sameiginlegu EES-nefndarinnar nr. 321/2022 frá 9. desember 2022 um breytingu á V. viðauka (Frelsi launþega til flutninga) og VIII. viðauki (Staðfesturéttur) við EES-samninginn (bíður birtingar).

(1) Stjttíð. ESB L 211, 15.6.2021, bls. 1.

(2) Reglugerð Evrópuþingsins og ráðsins (ESB) 2021/954 frá 14. júní 2021 um ramma um útgáfu, sannprófun og viðurkenningu samvirkandi COVID-19-vottorða um bólusetningu, próf og bata (stafrænt ESB-vottorð vegna COVID) vegna ríkisborgara þriðju landa sem dvelja eða búa löglega á yfirráðasvæðum aðildarríkjanna á meðan COVID-19-heimsfaraldurinn stendur yfir (Stjttíð. ESB L 211, 15.6.2021, bls. 24).

(3) Framkvæmdarákvörðun framkvæmdastjórnarinnar (ESB) 2021/1993 frá 15. nóvember 2021 um að koma á jafngildi COVID-19-vottorða sem gefin eru út á Nýja-Sjálandi og vottorða sem gefin eru út í samræmi við reglugerð Evrópuþingsins og ráðsins (ESB) 2021/953, til þess að greiða fyrir réttinum til frjálsrar farar innan Sambandsins (Stjttíð. ESB L 405, 16.11.2021, bls. 20).

- 4) Hinn 19. apríl 2022 upplýsti Nýja-Sjáland framkvæmdastjórnina um að Cooks-eyjar, Niue og Tókelá hafi óskað eftir því að það fari fram á rýmkun á framkvæmdarákvörðun (ESB) 2021/1993 svo að hún nái yfir COVID-19-vottorð sem gefin eru út á Cooks-eyjum, Niue og Tókelá. Eins og Nýja-Sjáland bendir á eru Cooks-eyjar og Niue sjálfstjórnarríki í frjálsum sambandi við Nýja-Sjáland á meðan Tókelá er yfirráðasvæði Nýja-Sjálands án sjálfstjórnar. Beiðni Nýja-Sjálands var sett fram sem hluti af skyldum þess til að taka grundvallarhagsmuni Cooks-eyja, Niue og Tókelá til greina.
- 5) Í þessu samhengi veitti Nýja-Sjáland framkvæmdastjórninni ítarlegar upplýsingar um útgáfu samvirkandi COVID-19-vottorða um bólusetningu og próf að því er varðar Cooks-eyjar, Niue og Tókelá innan kerfis sem ber heitið „Covid-skráin mín“, það er kerfisins sem fellur undir framkvæmdarákvörðun (ESB) 2021/1993. Nýja-Sjáland upplýsti framkvæmdastjórnina um að það líti svo á að COVID-19-vottorð sem gefin eru út að því er varðar Cooks-eyjar, Niue og Tókelá með því að nota kerfið „Covid-skráin mín“ séu gefin út í samræmi við staðal og tæknikerfi sem eru samvirkandi við traustrammann sem komið er á fót með reglugerð (ESB) 2021/953 og gera kleift að sannprófa ósvikni, gildi og heilleika vottorðanna. Nýja-Sjáland hefur í þessu tilliti upplýst framkvæmdastjórnina um að COVID-19-vottorð sem gefin eru út að því er varðar Cooks-eyjar, Niue og Tókelá í samræmi við kerfið „Covid-skráin mín“ innihaldi þau gögn sem sett eru fram í viðaukanum við reglugerð (ESB) 2021/953.
- 6) Nýja-Sjáland upplýsti framkvæmdastjórnina einnig um að Cooks-eyjar, Niue og Tókelá viðurkenni samvirkandi vottorð um bólusetningu og próf sem aðildarríkin og EES-löndin gefa út í samræmi við reglugerð (ESB) 2021/953.
- 7) Hinn 25. júlí 2022 lét framkvæmdastjórnin, í kjölfar beiðni frá Nýja-Sjálandi fyrir hönd Cooks-eyja, Niue og Tókelá, gera tæknipróf sem sýndu fram á að COVID-19-vottorðin um bólusetningu og próf sem Nýja-Sjáland hefur gefið út að því er varðar Cooks-eyjar, Niue og Tókelá í samræmi við kerfið „Covid-skráin mín“ eru samvirkandi við traustrammann sem komið er á fót með reglugerð (ESB) 2021/953 sem gerir kleift að sannprófa ósvikni, gildi og heilleika vottorðanna. Framkvæmdastjórnin staðfesti einnig að COVID-19-vottorðin um bólusetningu og próf, sem Nýja-Sjáland hefur gefið út að því er varðar Cooks-eyjar, Niue og Tókelá í samræmi við kerfið „Covid-skráin mín“, innihaldi nauðsynleg gögn.
- 8) Auk þessa upplýsti Nýja-Sjáland framkvæmdastjórnina um að það gefi út samvirkandi bólusetningavottorð fyrir COVID-19-bóluefni að því er varðar Cooks-eyjar, Niue og Tókelá, sem nú er Comirnaty.
- 9) Nýja-Sjáland upplýsti framkvæmdastjórnina einnig um að það gefi út samvirkandi prófvottorð fyrir kjarnsýrumögnunarpróf og fyrir mótefnavakapróf sem samþykkt eru af heilbrigðisöryggisnefndinni, sem komið er á fót með 17. gr. ákvörðunar Evrópuþingsins og ráðsins nr. 1082/2013/ESB ⁽⁴⁾, á grundvelli tilmæla ráðsins frá 21. janúar 2021 ⁽⁵⁾ að því er varðar Cooks-eyjar, Niue og Tókelá.
- 10) Enn fremur upplýsti Nýja-Sjáland framkvæmdastjórnina um að það gefi ekki út samvirkandi vottorð um bata að því er varðar Cooks-eyjar, Niue og Tókelá.
- 11) Enn fremur upplýsti Nýja-Sjáland framkvæmdastjórnina um að þegar sannprófundur á Cooks-eyjum, Niue og Tókelá sannprófa vottorð verði persónuupplýsingar sem fram koma í þeim aðeins unnar til að sannprófa og staðfesta bólusetningu eða prófniðurstöðu handhafa og gögnin verði ekki geymd eftir það.
- 12) Þannig eru til staðar nauðsynlegir þættir til að ákveða að líta skuli á COVID-19-vottorð sem eru gefin út á Nýja-Sjálandi að því er varðar Cooks-eyjar, Niue og Tókelá í samræmi við kerfið „Covid-skráin mín“ sem jafngild þeim sem gefin eru út í samræmi við reglugerð (ESB) 2021/953.

⁽⁴⁾ Ákvörðun Evrópuþingsins og ráðsins nr. 1082/2013/ESB frá 22. október 2013 um alvarlegar heilsufarsógnir sem ná yfir landamæri og niðurfellingu ákvörðunar nr. 2119/98/EB (Stjtið. ESB L 293, 5.11.2013, bls. 1).

⁽⁵⁾ Tilmæli ráðsins frá 21. janúar 2021 um sameiginlegan ramma um notkun og gildingu mótefnavakahraðprófa og gagnkvæma viðurkenningu á niðurstöðum úr COVID-19-prófum innan ESB (Stjtið. ESB C 24, 22.1.2021, bls. 1).

- 13) Því ætti að viðurkenna COVID-19-vottorð sem gefin eru út af Nýja-Sjálandi að því er varðar Cooks-eyjar, Niue og Tókelá í samræmi við kerfið „Covid-skráin mín“ með þeim skilyrðum sem um getur í 5. gr. (5. mgr.), 6. gr. (5. mgr.) og 7. gr. (8. mgr.) reglugerðar (ESB) 2021/953.
- 14) Til að þessi ákvörðun öðlist gildi ætti að rýmka tengingu Nýja-Sjálands við traustramma stafræna ESB-vottorðsins vegna COVID, sem komið er á fót með framkvæmdarákvörðun (ESB) 2021/1993, til að ná yfir vottorð sem gefin eru út á Cooks-eyjum, Niue og Tókelá.
- 15) Til að vernda hagsmuni Sambandsins, einkum á sviði lýðheilsu, er framkvæmdastjórninni heimilt að beita heimildum sínum til að fella þessa ákvörðun tímabundið eða varanlega úr gildi ef skilyrði 2. mgr. 8. gr. reglugerðar (ESB) 2021/953 eru ekki lengur uppfyllt.
- 16) Í ljósi þess að nauðsynlegt er að rýmka tengingu Nýja-Sjálands við traustramma stafræna ESB-vottorðsins vegna COVID, sem komið er á fót með reglugerð (ESB) 2021/953, til að ná yfir vottorð sem gefin eru út að því er varðar Cooks-eyjar, Niue og Tókelá eins fljótt og unnt er ætti þessi ákvörðun að öðlast gildi daginn eftir að hún birtist í *Stjórnartíðindum Evrópusambandsins*.
- 17) Ráðstafanirnar sem kveðið er á um í þessari ákvörðun eru í samræmi við álit nefndarinnar sem komið er á fót með 14. gr. reglugerðar (ESB) 2021/953.

SAMÞYKKT ÁKVÖRDUN ÞESSA:

1. gr.

Líta skal á COVID-19-vottorð um bólusetningu og próf, sem Nýja-Sjáland gefur út að því er varðar Cooks-eyjar, Niue og Tókelá í samræmi við kerfið „Covid-skráin mín“, sem jafngild þeim sem gefin eru út í samræmi við reglugerð (ESB) 2021/953 til þess að greiða fyrir réttinum til frjálsrar farar innan Sambandsins.

2. gr.

Rýmka skal tengingu Nýja-Sjálands við traustramma stafræna ESB-vottorðsins vegna COVID, sem komið er á fót með reglugerð (ESB) 2021/953, svo að hún nái yfir vottorðin sem falla undir 1. gr.

3. gr.

Ákvörðun þessi öðlast gildi daginn eftir að hún birtist í *Stjórnartíðindum Evrópusambandsins*.

Gjört í Brussel 13. október 2022.

Fyrir hönd framkvæmdastjórnarinnar,

Ursula VON DER LEYEN

forseti.
